

# In pass modest, dentant impurtant

L'economia grischuna da laina spera sin in segn da partenza da la resgia planisada a Tinizong

ANDREAS CADONAU/FMR

■ Per in impurtant signal valitescha l'organisaziun tetgala da l'economia grischuna da laina l'annunzia da la Uffer SA da vulair realisar a Tinizong ina resgia nova. Suenter la terrada da la resgia gronda a Domat mancan en il chantun Grischun structures adequatas per elavurar ina impurtanta materia prima. Il mainafatschenta da la Uniun tetgala da l'economia da laina dal chantun grischun, *Christian Felix*, ha fatg attent envers la FMR a las modestas dimensiuns actualas: «Enfin ussa elavuran las resgias grischunas tranter 30 000 e 40 000 cubics laina per onn.» La resgia nova planisada da la Uffer SA a Tinizong pudess persula elavurar il medem quantum laina. (La FMR ha rapportà l'entschatta d'avrigl).



La plipart da la laina grischuna vegn resgiada en l'exteriur ed uschia va blera plivalur a perder al Grischun.

FOTO GION NUTEGN STGIER

## Tinizong fiss in impurtant pass

Las resgias grondas da l'exteriur, e cun ellas l'antieriura resgia da Domat, èn tenor *Christian Felix* concepidas per elavurar dapli che 500 000 cubics laina. Strusch 400 000 cubics laina pon ins raccoltar per onn dal gaud grischun. Malgrà las modestas dimensiuns da la resgia planisada a Tinizong valitescha *Christian Felix* la nova resgia per in fitg impurtant pass per l'economia da laina en il chantun Grischun, per cas ch'ella vegniss realisada. «A nus manca per gronda part l'emprim stgalim per crear plivalur cun laina grischuna en il Grischun.» Per part attribuescha *Christian Felix* quel fatg a la terrada da la resgia gronda da Domat avant diesch onns. Ina che haja chaschunà ina greva plaja e che haja franà iniziativa per novs indrizs. Uschia focussescha l'economia grischuna da laina sias speranzas sin l'iniziativa a Tinizong. *Christian Felix* è numnadamain da l'avis ch'ina tala resgia pudess avair caracter da model per autras regiuns. «Trai, quatter sumegliantas resgias avessan senz'ater plaz en il Grischun.»

## Laina grischuna en l'exteriur

La gronda part da la laina grischuna chatta actualmain la via en l'Italia, laina da megliera qualitat vegn furnida en il Voralberg e sa tschenta per part era tar resgias svizras. La pli pitschna part da la blocca or dal gaud grischun vegn resgiada en il Grischun. Quai ha explitgà *Leo Thomann*, il president da la Selva, l'Associaziun dals possessurs grischuns da gaud. La laina pinada è actualmain dumandada e po vegnir furnida. Per pretchs levamain augmentads che sa chattan dentant anc adina sin bass nivel, sco quai ch'il president da la Selva ha ditg. *Leo Thomann*, dasper ses engaschi al timun da la Selva anc president communal da la vischnanca da Surses, ha menziunà che la decisiun definitiva da realisar la nova resgia na saja anc betg crudada. La resgia planisada a Tinizong na saja insumma betg da cumparegliar cun l'antieriura resgia a Domat, betg sulet pervia da la grondezza. «Impurtant è dad installar en ina nova resgia in indriz che lubescha da resgiar tuttas grondez- zas da blocca.» Las resgias grondas, ed

era l'antieriura resgia da Domat, èn u eran concepidas per resgiar sulettamain blocca cun in diameter da 25 enfin 40 centimeters. Betg exnum la dimensiun dals pigns en ils gauds grischuns.

## Reducir custs da personal

Per spargnar custs da personal sto ina nova resgia esser automatizada tant sco pussaivel. Economicamain interessanta è la soluziun dad elavurar plattas culadas da la laina resgiada. *Leo Thomann* ha fatg attent ch'ins possia duvrar per talas plattas colladas era laina da pli bassa qualitat. Insumma èn ils pretchs per laina resgiada creschids ils davos mais per enfin 50 pertschient. Tenor las infurmaziuns da *Christian Felix* èn las capacitads internaziunalas da transportar la laina restrenschidas pervi da corona. La dumonda per laina saja creschida en la China ed en ils Stadis Unids. Il martgà da laina è cumpletamain globalisà e uschia suttamess a las lunas da quella fiera. «Quai signifitga diversas intschertezas era per la fiera da laina grischuna», sco quai che *Christian Felix* ha accentuà.